

Bettina Vital «Au Premier»

Il practicum en l'ustaria nobla da la staziun: «Ina experientscha che vala aur»

DA CLAUDIA CADRUVI / ANR

■ **«Tar nus èsi propi amo cool», di Bettina Vital. Ils prominents che autra glied vesa en la televsiun, vesa ella numnadamain durant sia lavur. Per in mez onn fa ella in practicum «Au Premier».** Quai è il restaurant da noblezza da la staziun principala a Turitg. Là s'entaupa glied da fatschenta, politichers, prominents da la cultura e dal sport. Passants s'inscuntran a la svelta per in «business lunch». Baininqualin giavischa ina maisa nua ch'ins po sa discurren «nundisturbadamain». Discreziun s'enclegia da sasez en quest local distinguì. Ed avant che *Bettina Vital* s'entaupa cun la pressa, admonescha ses schef: Ella na dastgia numnar nagins nums e fotografias dastgian vegnir fatgas sulet en localitads, nua ch'i sa trategnan gist nagins giasts.

Ins na prenda betg mintgin

Avunda da scola e teoria. Quai ha Bettina Vital pensà ils ultims onns da gimnasia. Ella n'ha betg gi gust dad ir a studegiar. Uss ha ella la matura en satg e less probabel far la scola d'hotellaria. Perquai dovra ella in mez onn practica en la gastronomia. En l'Engiadina avess ella gi bleras pussaivladads. Ma per la giuvna eri uras da vesair ina giada insatge auter.

Il «Au Premier» steva sisum la glista da lieus da practicums ch'ella ha obtegnì da la scola d'hotellaria. Ella ha telefonà ed immediat pudì sa preschentar. Ins ha mussà ad ella l'entir manaschi. Betg sulet la cuschina separada e las salas dal «Au Premier». Na, ins ha mussà l'entir manaschi gastronomic da la staziun principala.

P. ex. era la cuschina gigantesca che sa chatta sut la halla da la staziun. Igl è bunamain ina fabrica che furnescha las numerusas ustarias da la staziun. Tar questa cuschina tutga in'atgna mazlaria ed ina furnaria. Bettina Vital è stada impressiunada ed ha vulì la piazza. Autras ustarias avessan er immediat engaschè ella. Ma per il «Au Premier» valan autras reglas. «Trais giadas hai jau stuì ir spera-



La primavaira passenta Bettina Vital l'ura da chombra gugent sper il lai cun ses collegas.

FOTOS C. CADRUVI

via fin ch'els m'han tut», raquinta Vital anc oz in pau surstada, ma er in zichel loscha.

Il personal sto er degustar

Il november ha la practicante cumenzà. Subit ha ella gi gust da lavurar. I n'è betg exnum l'ambient distinguì. Na, a lunga vista na less Vital gnanca lavurar en ina ustaria nobla. Quai saja be per in mez onn. Il plaschair da servir en quest lieu haja da far cun il personal. Tut las survientas, ils survients e la glied en cuschina sajan tranter 17 e 35 onns. Era las scheffas ed ils schefs.

La lavur cumenza enturn las 11.00. Avant il gentar sa raduna il personal. La scheffa u il schef di tge svieuta ch'ins ha fatg il di avant. Lura vegn declerà il menu da la carta dal di. I vegn explitgà tge vins che sa cunfan cun las spaisas. Ina giada l'emna ha il personal da degustar vins. «Per ch'ins sappia tge ch'ins recumonda insumma als giasts.»

«Au Premier» datti reglas severas. Tut

è da servir da dretg. Quai vala teoreticamain er en auters locals. Ma lura: Il maun sanester tutga durant servir davos il dies. Da servir vin èsi adina da mussar la butteglia, schizunt sch'il giast emposta sulet in deciliter en ina caraffa. Suenten la tratga principala vegn adina schubregià la maisa. Ins na dastgia mai ir ad incassar cun la bursa tar la maisa. Il quint vegn servì sin in tablet. Il giast metta la carta da credit sin il tablet. La cameriera vegn per il tablet. E vi e nà, fin che la procedura da pagar è finida.

Il sevice da mezdi va fin las 14.00 u per la segunda squadra cura che l'ultim hosp è svani. «Quai è in pau il disavantatg en la gastronomia.»

Sigl en l'aua freida

L'ura da chombra dura fin las 17.30. Per ordinari na va Bettina Vital betg a chasa. Ella s'entaupa pli gugent cun amis ed amias. Cun ils collegas dal gimnasi a Ftan che studegian uss a Turitg po ella betg s'inscuntrar suentermezdi. «Vi da

quai ston ins sa disar l'emprim», di la practicante.

Persuenten enconuscha ella uss glied che ha il medem ritmus. Cun lezs pasenta ella l'ura da chombra en la citad, u sper il lai. Sch'ella va cun ses novs collegas a baiver insatge, prendan els sut la lupa il local. Els studegian tge ch'els fasschessan auter en quest'ustaria. Pertge la finamira da Vital èsi «d'avair inagiada sez insatge».

La saira è la lavur main hectica. «Da mezdi datti bliers hosps che vegnan cun lur cofrignas, rasan ora actas sin maisa e vulan mangiar e far fatschentas entaifer in'ura e mesa.» La saira vegn in publicum che vul giudair tratgas exquisitas. Ins porscha in menu pli lung, pli raffinà, pli luxurius. La lavur è a fin enturn las 23.00.

E prest va er gia il practicum da Bettina Vital a fin. «Igl è stà in sigl en l'aua freida suenter la matura. Viver sulet a Turitg. Lavurar tuttenina corporalmain. L'entir di en pe. Star avant la glied.» E sch'ella cumenza propi la scola d'hotellaria n'è anc betg segir. Tschert è dentant: «Il practicum 'Au Premier' a Turitg è in' experientscha che vala aur.»

Curt e bun

Naschida: Ils 10 da settember 1981

Derivanza: Creschida si ad Ardez Matura a l'Institut otalpin a Ftan

Stil da musica: Hip hop, ragga, house

Hobi: Clavazina, chant, ballar

Occupaziun preferida: Observar la glied

Spaisa preferida: Plain in pigna

